

# Penderfyniadau i'w cymeradwyo

## 1. Eglwysi cynhwysol

Rydym fel Adran yr Eglwysi a'u Gweinidogaeth yn galw ar eglwysi Undeb yr Annibynwyr Cymraeg i ddyheu gyda ni i fod yn gwbl gynhwysol. Rydym am feithrin ethos lle mae meddylfryd, diwylliant, iaith, a threfniadaeth yn adlewyrchu cariad cynhwysol Crist. Rydym am fod yn llais i'r rhai heb lais, gan sefyll dros gyfiawnder, urddas, a chydarddoldeb i bawb. Apeliwn am eich cefnogaeth i'r adran wrth i ni weithio i greu arweiniad ymarferol ac ysbrydol, drwy baratoi adnoddau a fydd yn rhoi cymorth i eglwysi roi'r weledigaeth hon ar waith.

*Cynigydd:* Parchg Beti-Wyn James

*Eilydd:* Sian Meinir

*Ar ran Adran yr Eglwysi a'u Gweinidogaeth, Cyngor yr Undeb.*

## 2. Mabwysiadu datganiad gan yr Undeb

Hoffai'r Adran Dinasyddiaeth gynnig y datganiad canlynol i'w fabwysiadu gan yr Undeb.

### **Datganiad posib i gynhadledd flynyddol Undeb yr Annibynwyr Cymraeg**

Gresynwn bod rhai sy'n cyffesu Iesu o Nasareth yn Arglwydd yn cefnogi ymdrechion gwadedlyd Llywodraeth Israel, gyda chefnogaeth yr UDA, i ymestyn ei ffiniau ar draul ei chymdogion. Mae parhad y gwrthdaro yn y Dwyrain Canol ac Iran yn fgythyad enfawr i ddyfodol y diwylliant a'r hunaniaeth Palesteinaidd. Ni chredwn fod yr hyn a gofnodir yn Llyfr Genesis yn cyfiawnhau hil-laddiad a glanhau ethnig yn y Dwyrain Canol. Ein hargyhoeddiad yw mai ffordd Iesu, ffyrdd tangnefedd a chyfiawnder, sy'n mynegi ewyllys Duw Abraham, Isaac a Jacob.

Gwelir hefyd ryfeloedd eraill ledled byd, pob un, ar wahân a gyda'i gilydd, yn lladd plant Duw yn eu miloedd; dinistrir cymunedau, diffeithir bywoliaethau, creïr a dwyseir tlodi tra bod rhai unigolion a chorfforaethau yn gwneud elw ar draul lladd a dinistr.

Yr ydym fel eglwysi Undeb yr Annibynwyr Cymraeg yn datgan bod rhyfel yn gynhenid ddinistriol. Rydym yn cadarnhau bod ymrwymiad yr Undeb i heddwch yn hanfodol. Gwnawn hynny, nid o oherwydd ein bod yn rhannu'r un argyhoeddiadau gwleidyddol neu'n arddel yr un daliadau diwinyddol; na, safwn gyda'n gilydd er waethaf ein hamrywiol argyhoeddiadau a daliadau i ddatgan, fel un, bod pob rhyfel yn groes i ysbryd a dysgeidiaeth Iesu, Tywysog Tangnefedd, yr Hwn sydd yn Arglwydd i ni gyd.

Yn hyn, y datguddiad o Dduw a groniclir yn y Testament Newydd yw ein hawdurdod. Penllanw'r datguddiad hwnnw yw Croes Crist. Trwy'r Groes lleddir gelyniaeth er mwyn gwneud cymod a gwir heddwch. O'r dechrau, mewn rhyfel, lleddir gelynyon heb ladd yr elyniaeth. Cadoediad - oedi yn y gad - ac nid heddwch sy'n dilyn rhyfela. Bydd rhai am ddweud fod hyn yn ffolineb ac yn dangos gwendid, ond credwn ni mai doethineb Duw ydyw, nerth dwyfol. Dyma'r weinidogaeth y'n galwyd ni iddo yng Nghrist: 'Ond gwaith

Duw yw'r cyfan - Duw, yr hwn sydd wedi ein cymodi ni ag ef ei hun trwy Grist a rhoi i ni weinidogaeth y cymod. Hynny yw, yr oedd Duw yng Nghrist yn cymodi'r byd ag ef ei hun, heb ddal neb yn gyfrifol am ei droseddau, ac y mae wedi ymddiried i ni neges y cymod. Felly cenhadon dros Grist ydym ni, fel pe bai Duw yn apelio atoch trwom ni. Deisyf yr ydym dros Grist, cymoder chwi â Duw.' (2 Corinthiaid 5:18-20).

Gweinidogaeth ymarferol ydyw. Gweinidogaeth weithredol, nid negyddol. Hanfod ein heddychiaeth yw nid ymatal a pheidio gwneud, ond mynnu gwneud safiad nid yn gymaint yn erbyn rhyfel, ond yn hytrach *dros* heddych. Grym Efengyl Iesu Grist yw nid ei bod yn dweud 'Na' i rhyfel ond ei bod yn dweud 'Ie' brwd a chyson i bob ymgais at gymod ym mhob cylch.

*Cynigydd:* Parchg Robin Samuel

*Eilydd:* Parchg Jeff Williams

*Ar ran Adran Dinasyddiaeth, Cyngor yr Undeb.*

### 3. Tŷ John Penri i'r dyfodol

Yr ydym ni fel Pwyllgor Gweinyddol yn gofyn i'r gynhadledd am yr hawl i drafod addasrwydd cyfredol Tŷ John Penri i'r dyfodol. Y mae angen i ni fod yn ymatebol i'n hoes ac yn yr ysbryd hwnnw yr ydym ni'n cynnig hwn fel man cychwyn o ran meithrin meddylfryd gadarnhaol a hyblyg er lles, parhad a thwf yr Undeb a'i eglwysi. Rydym ni'n gofyn am yr hawl i weithredu, petai hynny'n addas (boed hynny'n addasu'r adeilad cyfredol neu symud i safle arall pe bai hynny'n fanteisiol).

*Cynigydd:* Dr Fiona Gannon

*Eilydd:* Parchg Jeff Williams

*Ar ran y Pwyllgor Gweinyddol.*

### Argymhellion / Cynigion yr Adrannau

**Y mae dau argymhelliad yn adroddiadau'r Pwyllgor Gweinyddol (gweler yr atodiad i gofnodion Pwyllgor Gweinyddol Ebrill 2026, tud. 32)**

1. Mae'r Pwyllgor Gweinyddol yn argymhell cynnydd o 5% o 1 Ionawr 2027 i bawb sy'n derbyn incwm oddi wrth yr Undeb neu ei eglwysi. Fodd bynnag, yn wyneb yr ansicrwydd economaidd presennol, gofynnir am ganiatâd i'r Pwyllgor Gweinyddol yn yr hydref gadarnhau'r canran, neu os bydd angen, ei addasu yng ngoleuni amgylchiadau.
2. Mae'r Pwyllgor Gweinyddol yn gofyn i symud yr argymhelliad blyneddol am gyflogau i dymor yr hydref blaenorol er mwyn gallu adlewyrchu yn gadarnach sefyllfa chwyddiant prisiau a chyflogau yn genedlaethol adeg gosod yr argymhelliad.